


PINIARNEQ 2023

AALLAANIARTUNUT PAASSISUTISSAT PISANILLU NALUNAARSUIFFIIT



EQQAAMAJUK!

**Pisatit kingusinnerpaamik oktobarip
15-iani nalunaarutigissagakkit.**

Tamanna kiisalu piniarnermut allagartamik nutaamik qin-
nuteqarneq imminut sullinnikkut www.sullissivik.gl-imi
imaluunniit kommunip sullissiviani pisinnaavoq

IMARSIORNERMI ISUMANNAALLISAANEQ



Nalunermik iinniart.



Aallanginninni silassaq sikulu pillugit nalunaarutit internetimi KNR-imiluunniit misissukkit.



Atisat oqortut eqqaamakkit.



Annanniutit nassakkit.



Sumukarniarerlutit tamatigut iisimatitsissutigiuk. Taamaaliornikkut nassaariuminarnerussaait.



Ipunit orussamaatillu eqqaamakkit.



VHF, GPS, pujorsiuat, qinnguartaat aamma imaanut nunap assinga eqqaamakkit.



Angallat kingguppat angallatip eqqaaniinnarit.



Angalaninni sila qanoq innersoq maluginiaruk. Allangoriataarsinnaavoq.



Angalareerlutit tikikkuit inuit iisimatinnissaat eqqaamajuk.



KALAALLIT NUNAANNI PINIARNERMI ILEQQORISSAARNEQ

PINIARNERMI EQQAAMASASSAT:

1. **Inatsisit atuuttut malikkit** – piniarneq tamarmi inatsisit atuuttut naapertorlugit ingerlanneqassaaq. Taamaattumik piniarnissamat piffissaliussat, nunat piniarfissat pisassiisutillu atuuttut paasiniakkit, aamma illit kommunerisavit iluani aalajangersarneqartut. Nunat eqqissisimatitat timmiaqarfillu eqqaanniittut sumiiffiit timmissanik illersuiffiusut ataqqikkit, timmissat eqqissillutik piaqqisinnaaqqullugit taamaalillutillu amerliartorsinnaaqqullugit.
2. **Aallaammik piniakkannut naleqquttumik atugaqarit, pissaanaveersaarit ungoorinallu** – uumasup pisariaqanngitsumik naalliutsinneqannginnissaa piniarnerup nuannersuuneranut ilaavoq. Taamaattumik aallaasini sulloqqortussutsip eqqortup atorneqarnissaa pingaaruteqarpoq, isumannaatsumillu ungasippallaanngitsumiit seqqortuaannartarit. Uumasut pissanneqassanngillat aattukkavillu assartornissaa qanillisarنياannarlugu ungoorissanngilatit.
3. **Pisatit tigusunnaasatillu tamaasa tigussavavit** – nunatsinni inoqutigiinnut, atisanut aamma eqqumiitsuliornikkut atortussiassanik atuinsinni uumasup tamarmiusup atorneqarnissaa ileqqoraarput. Taamaattumik pisaqaruit neqaa allallu nerineqarsinnaasut, atorneqarsinnaasullu allat tamakkerlugit nassartakkit. Taamatut ililluta nunatsinni pisuussutit uumassusillit atorluarnerussavagut.
4. **Aallaat misissoqqaaruk oqattaatigineranilu inuit, illut il.il. sissuikkit. Piniariarlutit aallannginninni sakkutit misissoqqaakkit** – aallaasivit piniagassanut atorneqartinnagu oqattaatigineqarsimanissaa qularnaaruk. Uumasup seqqugassavit tunuani inoqarnersoq misissoqqaartuaannassavat. Inuit allat, inissiat, angallatit allallu tungaannut aamma illoqarfiup iluani seqqunngisaannarit.
5. **Uumasut pisatit tamatigut nalunaarsortakkit** – uumasut pisisatit pillugit tamatigut allattuijuaannartarit taamaalillutit piniarnermut allagartat nutarterneqartussanngorpat ukiumoortumik immersugassat ajornannginnerusumik immersorsinnaaqqullugu. Piniagassat killilersukkat tamaasa pillugit pisanik immikkut nalunaarsuiffissaq immersoruk utertillugulu, taamaalilluni piniagassaqsutisit ineriartorneri pillugit Naalakkersuisoqarfik sapinngisamik pitsaanerpaamik ilisima-saqalersillugu.

Isumannaallisaaneq pingaaruteqarpoq pinngortitarsuaq peqqarniissinnaasoq sumiif-
fillu isorartunerujussui pissutigalugit. Mappersakkap matuma ungaluani imaatigut
isumannaallisaaneq pillugu annertunerusumik atuarit.

Saqqaani asseq: Nuuk Kangerluani tuttuq neqaanik panertitsineq.

Assiliisoq: Naja Holm

ASIMI EQQAKKAT QIMAANNAKKAT

Nunatsinni sumulluunniit pigaluaaraanni pinngortitaq alianaatsuvoq. Ukiunili kingullerni nunani tikitani alianaatsortaa takujuminaallisimavoq. Siusinnerusukut nunat alianaatsorsuusimasut maannakkut igitanik qimaannakkanik, puigukkanik imaluunniit aalisarnermut piniarnermullu atortunik, gummibáditoqqanik, umiatsiaaratoqqanik aquuterlatoqqanillu qimaannakkanik annaasanillu mingutsinneqarsimapput. Ileqqupalaaq tamanna piaarnerpaamik unitsittariaqarparput. Asimeereernerup kingorna saliinissaq eqqagassallu il.il. nunaqarfimmut illoqarfimulluunniit angerlaannissaat pisariusariaqanngilaq.

Illoqarfinni amerlanerni umiatsianut puttasut eqqaanni containerit eqqaaviit inissinneqartarput, igitassallu iginneqarnissaat akeqarani. Taamaattumik angalasi-magaangavit igitassatit tamatigut angerlaattakkit. Taamaalioruit uagutsinnut kingulitsinnullu pinngortitamiinnissaq piniarnissarlu nuannernerussaaq. Piniarluarina!

- Maangaannaq eqqaanak.
- Igitassat oqqullugit eqqaavissuarmut igikkit.



INGERLATSIVIMMIIT NUTAARSIASSAT

PISANUT NALUNAARUTEQARTARNEQ – SOORUNA PAPPILIARSORNEQ TAAMA ANNERTUTIGISOQ

Piniagassat killilersukkat piniartinnagit akuersissummik aalleqqaartoqartarpoq, kisianni ilisimaneqartutut aamma piniareernerup kingorna pisanut nalunaarummik immersuisoqartussaavoq. Tamarmik naalakkersuisoqarfimmut kommuuninullu pisat amerlassusiinut malinnaanissamut pingaaruteqarput, kisianni aamma ilisimatuussut-sikkut suliaqartartunut piniagassanik kisitsisartunut misissuisartunullu.

Naalakkersuisoqarfiup paasisutissat pisariaqartitai tassaapput pisaq qanoq ittuunersoq (pisaq, saniatigut pisarisuugaq, pissataq imaluunniit annaasaq), piniariaaseq taavalu paasisutissat piniartup kinaassusianut najugaanullu tunngasut.

Ilisimatuussutsikkut suliaqartartut soorlu Pinngortitaleriffik, kiisalu ilisimatuus-sutsikkut komite-t Atlantikup avannaani miluumasut imarmiut pillugit kommis-sioni (NAMMCO), qilalukkanut qaqortanut qernertanullu tunngatillugu Kalaallit Nunaata Canadallu akornanni ataatsimoortumik kommissioni (JCNB), nannunut tunngatillugu Kalaallit Nunaata Canadallu akornanni ataatsimoortumik kommissioni (JCPB) kiisalu Arfanniarnermut ataatsimiititaliarsuaq (IWC), pisat pillugit uumassu-silerinermut tunngasunik paasisutissanik pisariaqartitsipput, soorlu suiaassusia, angis-susia illaaqarnersorlu. Umasoqatigiit qanoq ineriartornerat pillugu naliliisinnaanis-saminnut kiisalu piniarnerup uumasoqatigiinnut sunniutai nalilersorsinnaajumallugit paasisutissat pisariaqartippaat. Sumiiffiit pisaqarfiit aamma atorfissaqartinneqartarput piniagassat sukku inglerlaartarnersut sumilu najuuttarnersut malinnaaviginiarlugit. Paasisutissat tamarmik ilisimatuussutsikkut siunnersuinermi atorneqartarput.

Pisanut nalunaaruteqarnermut pappilissat kommunimiit tunniunneqartartut ator-neqartarput, taakkulu immersornissaannut piffissamik atuinarsinnaasarluni. Ukiuni tulliuuttuni pisanik nalunaaruteqarnermut periarfissanik pitsaanernik peqalernissaa pi-lersaarutigineqarpoq, digitaliseeriinermut tunngasumik suliniummik APN-mi inger-latsisoqarami. Aallaqqaammut tutturnik umimmannillu piniarnerup aqunneqarnerata digitaliseererneqarnissaa pilersaarutaavoq, Sullissivik.gl akuersissummik aallerfigine-qarsinnaanngorlugu kiisalu pisanik nalunaaruteqarfissanngorlugu, kingusinnerusuk-kut app-eq maannakkut ineriartortinneqartoq atorneqarsinnaalissaaq. Piniagassanut killilersukkanut tamanut akuersissutinik qinnuteqarneq taavalu pisanik nalunaarute-qarnerup nittartagaq imaluunniit app-eq atorlugu periarfissaalernissaa pilersaarutigi-neqarpoq.

Drone-t suuppat?

Drone-t tassaapput robot-iaqqat timmisinnaasut ilaatigut assiliisinnaallutillu filmilior-sinnaasut. Nunarsuarmilu sorpassuarnut atorneqartarput, ilisimatusarnermi, annaas-siniarnermi, sunngiffimmi allanilu.

Malittarisassat suuppat?¹

Nunatsinni drone-nik atuineq Danmarkimi oqartussanit malittarisassiuunneqarpoq, nunatsinnut oqartussaaffik tamanna suli nuunneqanngimmat. Drone-t 25 kg-mit oqinneruneri imaluunniit oqimaanneruneri apeqqutaatillugit malittarisassiuunneqar-put, ataaniipput 25 kg ataallugu oqimaassusilinnut malittarisassat.

- Inuit pigisallu ulorianartorsiortinneqassanngillat ajoqusersuutaavallaanngitsumillu drone-t atorneqassapput.
- 100 meterit ataallugit qutsitsigisumi atorneqassapput.
- Silami inuppassuit katersuuffigisimasaat qulaallugit drone-t timmisinneqassanngil-lat.
- Mittarfeqarfiit minnerpaamik 5 km-isut ungasitsigissapput.



¹ *Droneflyvning i Grønland og Færøerne, Bestemmelser om luftfart med ubemandede luftfartø-
jer, som ikke vejer over 25 kg, Udgave 3, 9. januar 2004, BL 9-4, droneregler.dk*

Nunaminertat mianerisassat dronemik atuiffioqqusaanngitsut:

Nunaminertat mianerisassat eqqissisimatitalu ataaniittut drone-mik atuiffigeqqusaanngillat:

- Nuna Allanngutsaaliugaq tunup avannaaniittoq².
- Qimusseriarsuaq³.
- Arnangarnup Qoorua⁴.

Nunatsinni piniarnermut tunngatillugu inerteqqutit:

Nunatsinni nalunaarutini aamma ilaatigut drone-t atorneqartarnerinut inerteqquteqartoqarpoq:

- Drone-t nannunik filmiliornermut allatulluunniit malersuineranut atorinissat inerteqqutaavoq⁵.
- Timmissat ineqarfii drone-t atorlugit timmissat ineqarfiinut siumut sanimulluunniit 100 meterinit qaninnerutillugit timmiffiginissat inerteqqutaavoq⁶.

Malittarisassanik inatsisinillu unioqqutitsineq qanoq kinguneqartarpa?

Malittarisassanik qulaani taaneqartunik unioqqutitsineq akiliisitsinermik kinguneqarsinnaavoq.

² Kalaallit Nunaata avannaarsuani kangianilu Nuna Allanngutsaaliugassatut Immikkoortitaq pillugu Namminersornerullutik Oqartussat nalunaarutaat nr. 7, 17. juni 1992-imeersoq.

³ Qimusseriarsuarmi uumasunik eqqissisimatitsivik pillugu Namminersornerullutik Oqartussat nalunaarutaat nr. 21 ulloq 17. maj 1989-imeersoq.

⁴ Kalaallit Nunaata Kitaani, Maniitsup kommuneani, Arnangarnup Qooruata allanngutsaaliorneqarnera pillugu Namminersornerullutik Oqartussat nalunaarutaat nr. 31 ulloq 20. oktober 1989-imeersoq. (siullermik: Angujaartorfiup Nunaata allanngutsaaliorneqarnera pillugu nalunaarut ulloq 2. oktober 1984-imeersoq).

⁵ Nannunik piniarneq illersuinerlu pillugit Namminersorlutik Oqartussat nalunaarutaat nr 3, 14. september 2018-imeersoq, § 4. imm. 4.

⁶ Timmissanik illersuineq piniarnerlu pillugit Namminersorlutik Oqartussat nalunaarutaat nr. 17, 28. oktober 2019-imeersoq, § 12. Imm. 4.

EQQAAMALLUGU PISSATAT ANNAASALLU NALUNAARUTIGINISSAAT

Piniartilluni aallaaniartillunilu ilaatigut pissaasoqarlunilu annaasaqartoqarsinnaasarpoq. Piujuaanartitsineq tunngavigalugu piniarneq ingerlanneqarnerisooq naliliinermi, piniarnermi pissat annaasallu nalilersuinermi ilaatinneqartarput. Piniakkanut aalajangersimasunut killilersukkanut annaasat qassiunerisa naatsorsornissaannut piniarnermi annaasanik nalunaarutit atorineqartarput, taakkumi pisassiisoqarnissaanut uumassusilerisut inassuteqarnissaminni atortarpaat. Taamaattumik pissat/annaasat nalunaarutigiginissaat pingaaruteqarpoq. Naluneqanngitsut Naalakkkerisut pisassiissutissanik aalajangersaasarput, tamannalu peqassutsinut ataasiakkaanut paasissutisat pigineqartut pitsaanerpaat aallaavigalugit ingerlanneqartarluni.

Nalunaaruteqartannginnerup kingunerisinnaasai

Aqutsiveqarfimmi misilittakkat takutippaat piniakkanut ataasiakkaanut pissat annaasallu nalunaarutigineqartartut assigiinngisitaarnerat. Piniakkat ilaannut annaasanik nalunaaruteqartoqarpiarneq ajorpoq ilaannilu nalunaarutit ikittuinnaasarlutik.

Pisanik nalunaaruteqartannginneq assigiinngitsunik kinguneqarsinnaasarpoq. Naggataani kingunerisinnaavaa piniakkamut aalajangersimasumut pisassanik aalajangersaanermi mianersornissamik tunngavissat tunngavigalugit periutsip atorineqalerana, tamannalu piviusumik piniarneqarnerisa amerlassusiisa ilisimalerneqarnissaata tungaanut atuutsinneqartarluni.

Annaasat amigartumik nalunaarutigineqartarnerisa kingunerisinnaavaat nalunartut pillugit pisat annaaneqarsimassangatinneqartut amerlassusiisa amerlavallaartinneqarnerat, pissat annaaneqartut amerlassusiisa ilisimaneqannginnerat pissutaalluni. Tassa imaappoq pisassiissutinit piniagassat ilanngaataasarput, piniagassat qassit pissanneqartullu annaaneqarsimasut ilisimaneqanngimmat.

Aarrit

Ilaanni isumaqarnarsinnaavoq kisitsisit annertunngitsuinnaasut soqutaanngitsut, kisianni pisassiissutit killeqartut pilerngunneqartillugit pingaaruteqalersarput. Assersuutaasinnaavoq Qaanaap aqutsiveqarfiani aaffattassiissutit, piniartunit annaasanik nalunaaruteqartoqartanngimmat, annaasat annertussusii missingersuutaasumik 15 %-imik annertussusilerneqarput. Tamanna pisassiissutinit ima kinguneqarpoq, biologit inassuteqarnerminni pisassiissutissatut innersuussutaasut 15 %-imik ilanngarpaat. Uanilu assersuummi 15 %-it kisitsisinngorlugit aarrit 15-iupput.

Maannakkut Qaanaap aqutsiveqarfiani annaasat annertussusii 3 %-imut inisinneqarnikuupput, tamannalu piniartunik apersuisoqarenerata kingorna pivoq. Assersuutit takutippaa pisat aamma pissat annaasallu ilanngullugit nalunaarutigineqartarnissaasa pingaaruteqassusia, aarrit uumasooqatigiinnit pisarineqartartut qassiunerinik takutissimmat.

Niisat

Niisanik piniarnermi pissatat annaasallu nalunaarutigineqartarneri amigaataasarpur. Niisat pillugit inassuteqaat NAMMCO-p (Atlantikup Avannaani Miluumasut Imarmiut pillugit Ataatsimiititaliarsuaq) ilisimatuussutsikkut ataatsimiititaliaanit pissarsiarineqartarpoq. 2021-milu inassutigineqarpoq niisat ukiumut 2.900-ini amerlanerunngitsut pisarineqassasut, niisanniarneq piujuartitsinissamik tunngaveqartumik ingerlanneqassappat. Taamaattoq amerlassutsit nalimmassarneqarput pissatat annaasallu tunngavigalugit. Tassanili nunatsinni niisat pisarineqartartut tamarmik nalunaarutigineqartannginneri pissutaallutik ilanngarneqarput. Tassalu naggataani siunner-suineri inassutigineqarpoq nunatta kitaani niisat tulaanneqartut amerlanerpaamik 1.869-iunissaat. Taamalu naatsorsorneqarpoq niisanit 2.900-nit pisassiissutaasunit 1.031-t pissanneqartartut annaaneqartartullu ilaatigullu aamma pisatut nalunaarutigineqarneq ajortut.

Piniakkat Nunatta sanilerisattalu avitseqatigiiffisaat

Kalaallit Nunaat sanilerisaminik piniakkanik miluumasunik timmissanillu arlalinnik avitseqateqarpoq, soorlu nannut, qilalukkat aarrillu. Nunarput piniarnerup piviusumik ingerlaneranik takutitsisumik nalunaaruteqarnissamik pisussaaffeqarpoq. Kattuffiit imaluunniit suliniaqatigiiffiit assigiinngitsut aqputigalugit nunat sanilerisavut assigiinngitsut suleqatigaavut.

Avammut annisseqqusinnginneq

Piniarnerup nungusaataannigsumik ingerlanneqannginnerata kingunerisinnaasaasa ilagaat Kalaallit Nunaata ass. aarrinit nioqqutissanik annissisinnaajunnaarsinnaaneranik. Akulikitsumik CITES-imit nalunaarusiortoqartarpoq piniarneq nungusaataannigsumik ingerlanneqarnerisqoq nalilersorneqarluni.

Avatitsinnit nunarput alaatsinaanneqarpoq nuannarinngikkaluarutsiguluunniit. Tassani ilaatigut uumasunik illersuiniaqatigiit piniarneq alaatsinaattarpaat, piniarnerli nungusaataannigsumik ingerlanneqartoq pissuserissaartoqartorlu takutikkutsigu uumasunik illersuiniaqatigiit sunniiniartarneri pakkersimaarsinnaavavut.

Taamaattumik uumasut pissatat annaasallu pisanut nalunarsuiffimmut PINIARNEQ-mi nalunaarsuiffimmut nalunaarutigisarnissaat pingaaruteqarpoq.

PINIARNERMUT ALLAGARTAT – UKIUMOORTUMIK PISANIK NALUNAARNEQ, QANOQ NALUNAARTARPAT AAMMA SOOQ NALUNAARTARPAT

Piniarnermut allagartat nutarterniarukku ukiup siuliani pisatit nalunaarutigeqqaartussaavitit. Imminut sullinnissamut periarfissaq www.sullissivik.gl atorsinnaavat imaluunniit kommuunip sullissiviani Aalipi atorlugu.

Aalipip ingerlaannaq ukiumut pisanik nalunaarsuiffissaq nuisittarpa.

Eqqumaffigissavat nammineq sullissivinni piniariaatsit assigiinngitsut toqqagas-saammata, ukiumoortumik nalunaarsuiffissamit ataavartumillu nalunaarsuiffissamit pappiliaasunit toqqagassaqarnerulluni. Ataavartumik nalunaarsuiffik ukiup ingerlane-rani qaammatit tamaasa eqqaamatitsissutissat atorneqarsinnaavoq.

Piniakkanut paasissutissat tunniunneqarnerisigut ingerlatsinermi tunngavissat pitsaanerulissapput taamaallilluni aamma inassuteqarnissamut tunngavissat pitsaaneru-lerlutik.

Pisat pillugit qaammatikkaartumik nalunaarutigineqartartussat:

- Pisat amerlassusii piniariaaserlu (sakkoq = aallaat imaluunniit qassutit).
- Pizarisuukkat amerlassusii.
- Pissatat kivisitallu.

Uumasut piniagassat aallaammik pisatut nalunaarsorneqarsinnaapput, taamaattumillu aamma pissatatut kivisitatullu. Miluumasut imarmiut tamarmik timmissallu pisari-suukkatut nalunaarsorneqarsinnaapput. Puisit aamma qilalukkat qaqqortat qernertallu qassutinik piniarnissamut akuerisaammata kisimik qassutinik pisatut nalunaarsorne-qarsinnaapput.

Pizarisuukkat pitsaanerumik nalunaarsorneqarnissaat nunatsinni nunanilu allani ukiuni qulikkaartuni kingullerni eqqumaffigineqaraluttuinnarput. Piniakkani taak-kunani pizarisuukkat immami miluumasuni toqussutaanerpaarpaatut nalilerneqarni-kuupput. Taamaammat pizarisuukkat ikilineqarnissaat sulissutigineqarpoq, tamannalu aalisartumut piniartumullu iluaqutaassalluni. Nunatsinni aalisarnermi MSC-mik nalunaarusialioartarnermut atatillugu aamma pitsaanerumik nalunaaruteqarnissaq ukkatarineqarpoq.

Pissatat kivisitallu pillugit paasissutissat piniartunut ataasiakkaanut ersersittarpaat seqqornermi piniagaq eqqortumik aallaaneqarsimanersoq piaartumik toqunne-qarnissaa eqqarsaatigalugu, kiisalu piniakkamut eqqortumik ungasissuqarsimaneq sulloqqortussutsip imassallu suunerat eqqarsaatigalugu. Aallaasip eqqortumik na-kersarneqarsimanissaa aamma sunneeqataasinnaavoq. Pissatat kivisitallu amerlappata isumaqariaannaavoq toqutseriaaseq nalilersorneqartariaqartoq immaqalu pitsanngor-sarneqartariaqartoq.

AKUERSISSUTIT PISANIK NALUNAARUTITALERLUGIT UTERTINNEQASSAPPUT

Nunatsinni inuussutissarsiutigalugu sunngiffimmilu piniartut tuttunniarnermik umimmanniarnermillu nuannarisaqartuupput, tamanna akuersissutit tunniunneqartartut amerlassusii malillugit malunnaarlunnarpoq. Illoqarfinni nunaqarfinnilu sumiiffinni sullissiviit qinnuteqartitsereernikkut inuussutissarsiutigalugu sunngiffimmilu piniartunut akuersissutinik tunniussisartuupput, taamatuttaarlu akuersissutit tunniunneqartut utertinneqartullu nalunaarsorneqartarnissaat pillugu suliaqartartuullutik. Piniartut akuersissuteqarnertalimmik tuttunniarsinnaalernerminni aamma umimmanniarsinnaalernerminni inatsisit malillugit akuersissutip tununiittumik pisanik nalunaarsuiffissamik immersuinissamik pisussaaffeqalerput taamatullu aamma akuersissutip utertinneqarnissaanik. Akuersissummik immersuinikkut pisanik nalunaaruteqarnermi pisaqarfiit, tuttu suiaassusii, utoqqaassusii/angissusii aamma tunnoqassusii nalunaarutigineqartartussaapput.



Tuttunniarnermiit pisanik nalunaaruteqarnissaq inatsisitigut pisussaaffiuvoq.

Pisanik nalunaaruteqarnerit aqutsinermi aamma biologit inassuteqaasiornerminni atortarpaat, inassuteqaasiornissamullu pitsaanerpaamik tunngaveqarnissaq tassaalluni tuttoqatigiit pillugit sukumiisumik ilisimasaqarnissaq. Pisanik nalunaaruteqarnissaq taamaalilluni pingaaruteqarlunnarpoq, allaat Aalisarnermut Piniarnermullu Naalakkersuisumit ukiumoortumik tuttunniarissamut pisassiissutinik piffissaliussanillu aalajangiinissamut atorneqartarlutik.

Akuersissutit tamarmik pisanik nalunaaruteqarnertalimmik immersorneqartarnissaat utertinneqartarnissaallu Aalisarnermut Piniarnermullu Naalakkersuisoqarfimmiit (APN) ilaatigut TV-kkut allagartalersuinikkut ukiuni kingullerni sulissutigineqarpoq, kisianni akuersissutit utertinneqanngitsut suli amerlavallaarujussuarput. Tamanna kisitsisinik APN-ip ukiut tamaasa kommunini Sullissivinniit tigusartagaannik misissuigaanni ersarilluinnarpoq, inuussutissarsiutigalugu aamma sunngiffimmi piniartut tamarmik pisanik nalunaaruteqartarnerat pitsaannerusinnaavoq. Maleruagassat maannakkut sukaterneqarnissaat sulissutigineqarpoq, ilaatigut piniarnermut aallaniarnermullu inatsisip kiisalu nalunaarutit atuuttut nutarterneqarnerisigut. Tassani tuttunniarnermi umimmanniarnermilu pisanik nalunaaruteqartannginneq immikkut eqqarsaatigineqarluni. Pisanik nalunaaruteqartannginneq siunissami inuussutissarsiutigalugu aamma sunngiffimmi piniartunut akuersissutinik qinnuteqarsinnaanermik periarfissaqarnermut kinguneqarsinnaalissaaq, tuttu pillugit nalunaarummi §§ 19-20 aamma § 25 kiisalu umimmaat pillugit nalunaarummi §§ 20-21 aamma § 26 takukkit. Ajornerpaamik pisoqarpat piniarsinnanermut allagartamik piffissami killilikkami arsaagaasoqarsinnaavoq.

Pisanik nalunaaruteqartannginneq pillugu kommunimiit tuttunniarnissamut akuersissutit piniarfikkaartumik ataasiakkaaginnarlugit tunniunneqarsinnaalereerput tamanalu inuussutissarsiutigalugulu (akuersissummut tuttu qulit) aamma sunngiffimmi piniartunut (akuersissummut tuttu tallimat). Akuersissummik pisanik naammaginarumik immersorneqartumik utertitsinikkut aatsaat akuersissutinik nutaanik qinnuteqartoqarsinnaavoq. Taamaakkaluartoq piniarfinnut assiigiinngitsunut akuersissutinik ataatsikkut tunniussisoqarsinnaavoq soorlutaaq piniarfinnut ungasissumiittunut.

Piniarnermut allagartap 1. maaji sioqqullugu akilereersimanissaa pillugu piumasagaat aamma atuussinnaavoq, tamannalu inuussutissarsiutigalugu aamma sunngiffimmi piniartunut ilaannut piffissaq eqqorlugu akiliisimanngitsunut kinguneqarsinnaasarpoq.

Inuussutissarsiutigalugu aamma sunngiffimmi piniartut tuttunniarnermiit aamma umimmanniarnermiit inatsisitigut pisanik nalunaaruteqarnissamut pisussaaffeqarput. Taamaamat illit akuersissutivit pisanik nalunaarutitalimmik utertinneqarnissaa piusarineqarpoq – aamma pisaqarsimanngikkaluaruilluunniit. PINIARNEQ aqqutigalugu ukiumoortumik pisanik nalunaaruteqarneq nalinginnaasoq akuersissutip tunuaniittumik pisanik sukumiinerusumik nalunaaruteqarnermik ilaneqartussaavoq.

- Kommunini sullissiviit aqqutigalugit tuttunut akuersissummik qinnuteqassaait.
- Akuersissutit utertissavat pisanik nalunaarsuiffik immersorsimasoq ilanngullugu.
- Sullissiviit tuttunut umimmannullu akuersissutinik tunniussisarput.

UNIOQQUTITSISUMIK PINIARNERMIK TAKUNNITTUUIT?

Aalisarnermut Piniarnermullu Naalakkersuisoqarfik (APN) unioqqutitsisumik piniar-neq pillugu saaffiginnissutinik imaluunniit tamanna pillugu pasilliutinik tigusaqaku-lasarpoq, saaffiginnittullu pisoqartillugu imaluunniit pisoqareertillugu qanoq iliornis-sani nalusarlugu. Unioqqutitsisumik piniar-neq piniarnissamut piffissaliussap avataani pisimasinnaavoq, piniakkat killilersukkat akuersissutitaqqanngitsumik piniar-neqarsima-sinnaapput, amerlavallaanik pisaqartoqarsimasinnaavoq imaluunniit inerteqqutaa-sumik piniariaaseq atorlugu piniartoqarsimasinnaavoq il. il. Saaffiginnissutit APN-imi tigugaangatsigit uppernarsaatinik piumasarpugut, soorlu aqqi, sumiiffik, assinik kiisalu unioqqutitsineq videoliarineqarsimassappat video-nik, pissutigalugu Politiinut nalunaarutiginninnermi atorlugaqarmata. Nakkutilliisut aamma suliassittarpavut suliaq erseqqinnerusumik misissoqqullugu uppernarsaatinillu pissarsiaqqullugit. Unioqqutitsinerit pillugit qanorlu Politiinut nalunaarutigineqarnissaat pillugu APN malittarisassaarpoq, inatsisit taamaalillutik malinneqartarlutik.

Nakkutilliisut suliassaraat aqutsiveqarfinni nakkutilliineq, kisianni innuttaasut unioqqutitsisumik piniarnermik takunnissimagaangamik pisussaaffigaat APN-imut, Kommunimut imaluunniit Politiinut saaffiginninnissaq. Taamaattoorli pisumik Poli-tiinut nalunaarutigineqartumik siullermit takunnittoqarsimanissaa pingaaruteqarpoq, pissutigalugu pisumik takunnittut – pisoq pineqartoq pillugu oqaluttuarsinnaam-mata takunninngitsut pisumik takunnittumiit oqaluttuarfigineqartumiit imaluunniit takunnittumiit oqaluttuarfigineqartumiit oqaluttuarfigineqaannartut sanilliullugit.

Unioqqutitsisumik takunnissimaguit imatut iliorsinnavutit (*):

- Unioqqutitsisumik pisoqarnerani assiliisarlutit imaluunniit videoliorlutit. Assit videollu internet-imeersut uppernarsaatit atorsinnaanngillat pissutigalugu qanga pisimansoq takussutissartaqqanngimmat.
- Assit videollu internet-imeersut pisup misissornerqarnerani atorsinnaapput.
- APN-imut, sumiiffimmi Nakkutilliisunut, Kommunemut imaluunniit Politiinut telefonikkut, mailikkut imaluunniit nammineq ornigullutit saaffiginnillutit.
- Pineqartup atia – imaluunniit pineqartut atii – nalunaarutigalugit.
- Piniakkap suunera aamma aqutsiveqarfiup sorliunera nalunaarutigalugu.
- Pisoq sapinngisamik sukumiinerpaamik oqaluttuaralugu (APN, Kommune imaluunniit Politiit pisup allaganngorlugu oqaluttuarineqarnissaa piumanerussa-vaat, pissutigalugu illit nammineq pisoq pillugu oqaluttuarisat suliaq ingerlanerani nukittunerpaatut inissisimassammat).

**: takunnittup oqaluttuarnera assinut imaluunniit videonut sanilliullugit uppernarsa-ruminaannerusarpoq, kisianni suliaq ingerlanerani iluaqutaalluni. Naggataatigut Politiit aalajangissavaat uppernarsaatit qanoq atorluarsinnaatiginersut – ilumullu inatsisinik unioqqutitsisoqarsimanersoq.*

UKIUMOORTUMIK IMMERSUIFFISSAMI ALLANNGUUTIT PINGAARUTILLIT

Ukiumoortumik immersuiffissami piniakkat uku ilaajunnaarput: qilalugaq qaqorta, qilalugaq qernertaq, aaveq aamma nanoq. Taakkuninnga pisaqartarnerit pisanik immersuiffissat immikkut ittut akuersissutinut ilanngullugit tunniunneqartartut atorlugu nalunaarutigineqartartussaapput. Pisaqareernerup kingorna pisamik immersuiffissaq kommunip allaffianut piaarnerpaamik tunniunnessaaq. Piniakkanik pineqartunik pisaqarsimaguit malittarisassat malinnissaanut pisussaaffeqarputit.

Piniakkat sinneri eqqarsaatigalugit pisatit suli ukiumoortumik immersuiffissaq atorlugu nalunaarutigisassavatit. Tamanna kingusinnerpaamik 15. Oktobari 2023-mi www.sullissivik.gl-mi/selvbetjening-mi isumagissavat imaluunniit kommunip innuttaasunut sullissivia aqqutigalugu.

Ukiumoortumik immersuiffissap aterpiaani pissatat aamma annaasat nalunaarutigisinaavatit.

PINIARIANNGINNINNI AKUERSISSUMMIK PISSARSEQQAARIT

Piniariannginnermi kikkulluunniit piniakkanik killilersukkanik piniariarniartut akuersissummik qinnuteqaqqaarsimanissaat kaammattuutigineqarpoq. Tassami piniariannginnermi akuersissutinik piniaqqaarsimagaanni, piniariarfimmullu nassarlugu, akiligassat pineqaatissiisutaasinnaasullu allat pinngitsoorneqarsinnaammata.

Akiligassiisutip tusintillit arlaqartut angusinnaasarpaa, apequtaalluni uumasut qassit, uumasuq suna taavalu aalajangersakkat qassit unioqqutissimanerlugit. Pisamik arsaarinninneq pineqarsimanngippat akiligassamik annertunermik takkuttoqarsinnaavoq, pisap nalinga akiligassamat ilanngunneqarsimassammat. Arlaleriarluni unioqqutitsinermi piffimmik aalajangersimasumik piniarnermik allagartaqqaqusaannginnermik kinguneqariataarsinnaavoq.

Akuersissutissat piffissaqarluartillutit kommune sumiiffigisannut aaguk.

PINIAGASSAT ASSIGIINNGITSUT PILLUGIT PAASSISUTISSAT: INATSISIT, PIFFISSALIUSSAT AAMMA MALERUAGASSAT

NANNUT

Inatsisit: Kalaallit Nunaanni nannunniarneq inatsisitigut nannunik piniarneq illersuinerlu pillugit Namminersorlutik Oqartussat nalunaarutaat nr. 3, 14. sept. 2018-imeersumi malittarisassiuunneqarpoq.

Nannunniarnissamut piffissaliussat: Kalaallit Nunaata Kitaani (Nanortalik-Qaanaaq) septembarip aallaqqaataaniit juunip 30-iat ilanngullugu, Tunumilu (Ittoqqortoormiit aamma Tasiilaq) oktobarip aallaqqaataaniit juulip 31-iat ilanngullugu.

Ilitsersuutit: Nannunik naamattuinermi qanoq pissuseqarnissamut ilitsersuut www.sullissivik.gl -mi takuneqarsinnaasoq Namminersorlutik Oqartussat nutarternikuuat, tassani aamma nannup toqunneqarnerata kingorna amia, niaquata saarnga aamma aqajarua qanoq passunneqassanersut ilanngunneqarlutik.

Sulloqqortussutsinut piunasaqaat: Qoorortoq minnerpaamik kaliber .30-06 sulloqqortussusilik.

Pisarineqartut 2016-2021	2016	2017	2018	2019	2020	2021
Tamakkerlugit	120	142	158	140	153	137

AARRIT

Inatsisit: Aavernik piniarneq inatsisitigut aavernik illersuineq piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersumi malittarisassiuunneqarpoq.

Piniarnissamut piffissaliussat: Kalaallit Nunaata Kitaani aaveqatigiit 66°N – 70°30'N: martsip aallaqqaataaniit apriliip 30-iat ilanngullugu. Kitaani sumiiffiit avannarpasis-sutsip 70°30N-ip avannaatungaani: oktobarip aallaqqaataaniit juunip 30-iat ilanngullugu. Tunumi: oktobarip aallaqqaataaniit juunip 30-iat ilanngullugu.

Sulloqqortussutsinut piunasaqaat: Qoorortoq minnerpaamik kaliber .30-06 sulloqqortussusilik.

Pisarineqartut 2016-2021	2016	2017	2018	2019	2020	2021
Tamakkerlugit	135	111	98	114	104	127

ARFERIT ANGISUUT

Inatsisit: Arfernik angisuunik piniarnermi pineqarput: tikaagullik, qipoqqaq, arfvik aamma tikaagulliusaaq. Piniarneqarneri inatsisitigut arfernik angisuunik illersuineq piniarnerlu pillugit Namminersorlutik Oqartussat nalunaarutaat nr. 9, 6. december 2018-imeersumi kiisalu arfattat angisuut pissatallu nalunaarutigineqartarnerat pillugu Namminersornerullutik Oqartussat nalunaarutaat nr. 12, 16. juli 2010-meersumi malittarisassiuuneqarput.

Piniarnissamut piffissaliussat: Arfvik: aprilip aallaqqaataaniit decembarip 31-iat ilanngullugu. Tikaagullit, tikaagulliusaat aamma qipoqqaat: Januarip aallaqqaataaniit decembarip 31-iat ilanngullugu.

Ilitsersuutit: Imarmiunik unioqqutitsilluni pisaqartoqartillugu, imminut illersorni-arluni imaluunniit piniakkanik killilersukkanik saniatigut pisisuukkanik qassutini saniatigut pisisuuisoqartillugu ilitsersuut nittartakkami www.sullissivik.gl -mi taku-neqarsinnaavoq.

Sulloqqortussutsimut piunasaqaat: Arfernik anginernik piniarnermi taamaallaat atorneqarsinnaapput qamutiliit qaartartortalimmik tuukkartallit 50 mm-inik kaliberillit. Ataatsimut piniaqatigiilluni tikaagullinniarnermi qoorortoq minnerpaamik kaliber .30-06 sulloqqortussusilik.

Pisarineqartut 2016-2021	2016	2017	2018	2019	2020	2021
Tikaagulliusaaq	9	8	7	8	3	2
Arfvik	0	0	0	0	0	0
Qipoqqaq	5	2	6	4	4	7
Tikaagullik	163	143	118	171	181	207

QILALUKKAT QAQORTAT QERNERTALLU

Inatsisit: Qilalukkanik qaqortanik qernertanillu piniarneq inatsisitigut qilalukkat qaqortat qernertallu illersugaanerat piniagaanerallu pillugit Namminersorlutik Oqartussat nalunaarutaat nr. 3, 27. januar 2017-imeersumi malittarisassiuuneqarpoq.

Piniarnissamut piffissaliussat: Ukioq kaajallallugu qaqortanik qernertanillu qilalugarniartoqartarpoq: januaarip aallaqqaataaniit decembarip 31-iat ilanngullugu.

Ilitsersuutit: Imarmiunik unioqquitsilluni pisaqartoqartillugu, imminut illersorniarluni imaluunniit piniakkanik killilersukkanik saniatigut pisisuukkanik qassutini saniatigut pisisuuisoqartillugu ilitsersuut nittartakkami www.sullissivik.gl -mi takuneqarsinnaavoq.

Sulloqqortussutsimut piumasagaat: Qoorortoq minnerpaamik kaliber .30-06 sulloqqortussusilik.

Pisarineqartut 2016-2021	2016	2017	2018	2019	2020	2021
Qilalukkat qaqortat	203	196	213	265	198	148
Qilalukkat qernertat	401	426	509	534	286	419

ARFERIT MIKINERIT

Arferit mikinerit tassaapput niisa, aarunaq, aarluarsuk, niisarnaq aarlullu.

Piniarnissamut piffissaliussat: Ukioq naallugu.

Pisarineqartut 2016-2021	2016	2017	2018	2019	2020	2021
Niisa	2.375	2.385	2.890	2.778	3.300	2.969
Anarnaq	3	16	0	8	2	1
Niisarnaq	195	384	399	305	222	192
Aarluk	14	18	21	17	29	10
Aarluarsuk	123	98	137	225	250	206

PUISIT

Inatsisit: Puisinniarneq inatsisitigut puisit illersugaanerat piniagaanerallu pillugit Namminersornerullutik Oqartussat nalunaarutaat nr. 16, 12. nov. 2010-meersumi malittarisassiuunneqarpoq.

Malugiuk: Qasigiaq aamma sigguttooq (puisi sigguttooq) Kalaallit Nunaanni eqqis-simatitaalluinnarmata taakkualu piniarneqartunut ilaanngillat.

Piniarnissamut piffissaliussat: Puisinniarneq ukioq kaajallallugu ingerlanneqartarpoq, januaarip aallaqqaataaniit decembarip 31-at ilanngullugu.

Sulloqqortussutsinut piumasaaqatit: Aallaasit minnerpaamik kaliber 17HMR, cal. 22WMR aamma kaliber 20.

Pisarineqartut 2016-2021	2016	2017	2018	2019	2020	2021
Natsersuaq	1.516	1.526	1.025	1.622	760	1.044
Ussuk	1.332	1.143	1.072	1.084	744	689
Aataaq	39.347	32.804	31.883	32.442	21.890	23.288
Allattooq	17.563	15.904	16.848	17.574	10.319	9.333
Natseq	48.219	40.954	48.085	45.868	30.049	21.611

TUTTUT

Inatsisit: Tuttunniarneq inatsisitigut Namminersorlutik Oqartussat nalunaarutaat nr. 7, tuttut nujuartat illersugaanerat piniagaanerallu pillugit 27. juni 2013-meersumi malittarisassiuunneqarpoq.

Sulloqqortussutsinut piumasaaqatit: Inuussutissarsiutigalugu aamma sunngiffimmi piniarnermi qoorortoog minnerpaamik kaliber 222 sulloqqortussusilik. Tammajuit-sussarsiorluni piniarnermi qoorortoog minnerpaamik kaliber .243 sulloqqortussusilik.

Pisissimik piniarneq: Inuussutissarsiutigalugu, sunngiffimmi aamma akiliilluni piniarneq: Pisisseq Compound-iusoq qarsut naqqi aalajangersimasut atorneqartillugit minnerpaamik 45-pund-nik (21 kg.) nusutsisinnaassusilik, qarsullu naqqi mekani-skusut atorneqartillugit minnerpaamik 55-pund-nik (25 kg.) nusutsisinnaassusilik. Qarsut naqqi aalajangersimasut minnerpaamik 385 grains-nik (25 gr.) oqimaassuseqassapput, qarsuillu naqqi mekaniskusut minnerpaamik 425 grains-nik (28 gr.) oqimaassuseqassapput.

Pisarineqartut 2016-2021	2016	2017	2018	2019	2020	2021
Tamakkerlugit	12.008	12.460	11.161	13.075	9.535	6.965

UMIMMAAT

Inatsisit: Umimmanniarneq inatsisitigut Namminersorlutik Oqartussat nalunaarutaat nr. 8, umimmaat illersugaanerat piniagaanerallu pillugit 27. juni 2013-imeersumi malittarisassiuunneqarpoq.

Sulloqqortussutsinut piunasaqaatit: Inuussutissarsiutigalugu aamma sunngiffimmi piniarnermi qoorortoq minnerpaamik kaliber .6.5x55mm sulloqqortussusilik. Tamajuitsussarsiorluni piniarnermi qoorortoq minnerpaamik kaliber .30-06 sulloqqortussusilik.

Pisissimik piniarneq: Inuussutissarsiutigalugu, sunngiffimmi aamma akiliilluni piniarneq: Pisseq Compound-iusoq minnerpaamik 60-pund-nik (28 kg.) nusutsisinaassusilik. Qarsut minnerpaamik 525 grains-nik (34 gr.) oqimaassuseqassapput. Qarsut mekaniskiusut atoqusaanngillat.

Pisarineqartut 2016-2021	2016	2017	2018	2019	2020	2021
Tamakkerlugit	2.656	1.568	1.835	2.246	1.820	1.401

TIMMISSAT

Inatsisit: Timmissanik piniarneq inatsisitigut timmissat illersugaanerat piniagaanerallu pillugit Namminersorlutik Oqartussat nalunaarutaanni nutaami nr. 17, 28. oktobari 2019-imeersumi malittarisassiuunneqarpoq. Sumiiffiit eqqissisimatitat nutaat tallimaapput, appat sigguttuut aamma appat Zone 1-mi aamma 2-mi upernaakkut piniagaajunnaarput, tulukkat aamma naajat ukiuni tallimani misileraataasumik ukioq kaajallallugu killeqanngitsumik piniarneqarsinnaapput, Mittarfeqarfiit imaluunniit kommunit periarfissaqarput mittarfiit, eqqaaviit aamma eqqaavissuit eqqaanni tulukkat naajallu manniinik katersitsinissamut imaluunniit uuliamik serpartaatsinissamut kiisalu timmissanik qinnuteqarnikkut nalunaaqutsersuisinnaaneq periarfissaavoq.

Sulloqqortussutsinut piunasaqaatit: Timmiarsiut sullua annerpaamik 12-iusoq aamma qoorortuuqqap sullua minnerpaamik .17-iusoq.

Piniariaatsit allat: Saaqutit nuffisilluunniit nalinginnaasumik kiisalu Zone 1-mi aamma Zone 4-mi appaliarsunniarnermi qalut aamma naperniutit ipullit.

Piniarnissamut piffissaliussat:

Timmissat killilersukkat – Ukiakkut aamma ukiukkut piniarneq

	Zone 1	Zone 2	Zone 3	Zone 4
Miteq	15. okt.-30. apr.	15. okt.-30. apr.	15. okt.-31. mar.	15. okt.-30. apr.
Miteq siorakitsoq	15. okt.-30. apr.	15. okt.-30. apr.	15. okt.-31. mar.	15. okt.-30. apr.
Appa	15. okt.-29. febr.	15. sept.-15. nov.	1. nov.-15. dec.	1. nov.-31. dec.
Appa sigguttooq	15. okt.-29. febr.	15. sept.-15. nov.	1. nov.-15. dec.	1. nov.-31. dec.
Taateraaq	1. sept.-31. okt. 1. mar.-31. mar.	1. sept.-31. okt. 1. mar.-31. mar.	1. sept.-31. mar.	1. sept.-31. mar.

Malugiuk: Inuussutissarsiutigalugu aamma sunngiffimmi piniartut ullormut pisarisinnaasaat killeqarput.

Timmissat killilersukkat – Upernaakkut piniarneq

	Zone 1	Zone 2	Zone 3	Zone 4
Miteq	1. maj-31. maj	Matoqqavoq	Matoqqavoq	Matoqqavoq
Miteq siorakitsoq	1. maj-31. maj	Matoqqavoq	Matoqqavoq	Matoqqavoq
Appa	1. marts-15. juni	15. april-15. maj	Matoqqavoq	Matoqqavoq
Appa sigguttooq	1. marts-15. juni	15. april-15. maj	Matoqqavoq	Matoqqavoq

Malugiuk: Inuussutissarsiutigalugu aamma sunngiffimmi piniartut ullormut pisarisinnaasaat killeqarput.

Timmissat killilersugaanngitsut

	Zone 1	Zone 2	Zone 3	Zone 4
Appaliarsuk	1. jan.-31. dec.	1. sept.-30. apr.	1. sept.-30. apr.	1. jan.-31. dec.
Qeerlutooq	1. sept.-29. febr.	1. sept.-29. febr.	1. sept.-29. febr.	1. sept.-29. febr.
Nerleq siggukitsooq	1. sept.-30. apr.	1. sept.-30. apr.	1. sept.-30. apr.	1. sept.-31. maj
Kangoq	1. sept.-15. okt.	1. sept.-15. okt.	1. sept.-15. okt.	1. sept.-15. okt.
Canadapnerlera	1. aug.-15. okt.	1. aug.-15. okt.	1. aug.-15. okt.	1. aug.-15. okt.
Nerlernaq	1. sept.-30. apr.	1. sept.-30. apr.	1. sept.-30. apr.	1. sept.-31. maj
Serfaq	1. sept.-31. mar.	1. sept.-31. mar.	1. sept.-31. mar.	1. sept.-31. mar.
Alleq	1. sept.-29. febr.	1. sept.-29. febr.	1. sept.-29. febr.	1. sept.-29. febr.
Tulugaq	1. jan.-31. dec.	1. jan.-31. dec.	1. jan.-31. dec.	1. jan.-31. dec.
Qaqulluk	1. sept.-31. okt.	15. aug.-31. okt.	1. sept.-31. okt.	1. sept.-31. okt.
Tuullik	1. sept.-15. okt.	1. sept.-15. okt.	1. sept.-15. okt.	1. sept.-15. okt.
Aqisseq	1. sept.-30. apr.	1. sept.-31. maj	1. sept.-30. apr.	1. sept.-30. apr.
Naajaan-naq	1. sept.-30. apr.	1. sept.-30. apr.	1. sept.-30. apr.	1. sept.-30. apr.
Naajaru-jussuaq	1. jan.-31. dec.	1. jan.-31. dec.	1. jan.-31. dec.	1. jan.-31. dec.
Naajarluk	1. jan.-31. dec.	1. jan.-31. dec.	1. jan.-31. dec.	1. jan.-31. dec.
Oqaatsoq	1. sept.-31. mar.	1. sept.-31. mar.	1. sept.-31. mar.	1. sept.-31. mar.

NUNAMI MILUUMASUT ALLAT

Kukiffaajuup eqqissimatitaanera pillugu Namminersornerullutik Oqartussat nalunaarutaat nr. 13, 13. september 2004-meersoq. Kukiffaajooq Kalaallit Nunaanni eqqissimatitaalluinarpoq ukiorlu kaajallallugu piniacquasaanani.

Terianniat illersugaanerat piniagaanerallu pillugit Namminersorlutik Oqartussat nalunaarutaat nutaaq nr. 14, 18. oktober 2019-imeersoq. Terianniat ukiuni tallimani misileraataasumik inuussutissarsiutigalugu imaluunniit sunngiffimmi piniarnermut allagartalinneq inoqarfiit, savaateqarfiit aamma qimuttunik qimmeqarfiit eqqaanni ukioq kaajallallugu piniarneqarsinnaapput. Tamanna Kalaallit Nunaat tamakkerlugu nuna allanngutsaaliugaq minillugu atuuppoq.

Piniarnissamut piffissaliussaag: Septembarip 16-ianiit maajip 14-iat ilanngullugu. Taamaattorli inoqarfiit, savaateqarfiit aamma qimuttunik qimmeqarfiit eqqaanni ukioq kaajallallugu.

Sulloqqortussutsinut piumasagaatit: Aallaasit sulloqqortussutsit akuerisat minnerpaaffiat cal. 17HMR-iuvoq. Sakkut eqittaannartakkat nutsuinnartakkallu atoqqusaanngillat.

Malugiuk: Kommunit/aqutsiveqarfiit ilaanni piniarnermut piffissaliussat atortullu pillugit malitarisassat kommunip ileqqoreqqusaatigut allaanerusinnaapput. Taamaammat kommuni najugaqarfisat saaffigiuk.

Pisarineqartut 2016-2021	2016	2017	2018	2019	2020	2021
Tamakkerlugit	962	1.093	911	660	431	305

Kalaallit Nunaanni ukallit eqqissimatitaanerat pillugu Namminersornerullutik Oqartussat nalunaarutaat nr. 19, 17. maj 1989-imeersoq.

Piniarnissamut piffissaliussaag: Aggustip aallaqqaataaniit apriliip 30-iat ilanngullugu.

Sulloqqortussutsinut piumasagaatit: Timmiarsiut, qoorortuaraq aamma qoorortoq nalinginnaasoq. Sakkut eqittaannartakkat nutsuinnartakkallu atoqqusaanngillat.

Malugiuk: Kommunit/aqutsiveqarfiit ilaanni piniarnermut piffissaliussat atortullu pillugit malitarisassat kommunip ileqqoreqqusaatigut allaanerusinnaapput. Taamaammat kommuni najugaqarfisat saaffigiuk.

Pisarineqartut 2016-2021	2016	2017	2018	2019	2020	2021
Tamakkerlugit	2.402	2.092	1.527	1.583	1.232	912

Amaqut illersugaanerat piniagaanerallu pillugit Namminersorlutik Oqartussat nalunaarutaat nr. 33, 11. september 2020-meersoq.

Amaqut eqqissimatitaalluinnarput taamaallaallu aqutsiveqarfinni Qaanaaq aamma Ittoqqortoormiit piniarneqarsinnaallutik.

Piniarnissamut piffissaliussat: Amaqut aqutsiveqarfinni Qaanaami aamma Ittoqqortoormiini atuuttumik inuussutissarsiutigalugu piniarnermut allagartalinntik ukioq naallugu piniarneqarqusaapput.

Sulloqqortussutsinut piumasagaatit: Qoorortoq minnerpaamik cal. .222 sulloqqortussusilik.

Malugiuk: Amaqut Kalaallit Nunaata sinnerani eqqissimatitaapput.

Kommunimi ileqqoreqqusat

Kommunini ileqqoreqqusaliat arlallit pigineqarput piniarnermik malittarisassanit sukannernerusinnaasut. Taamaattumik kommunimut angerlarsimaffigisannut saaffiginigit ileqqoreqqusat sorliit kommuninni atuunnersut paasiniallugit. Assersuutigalugu nunatsinni kommunit ilaanni makkununga tunngasuni ileqqoreqqusaqartitsisoqarpoq: puisinniarneq, puisinut qassusersorneq, timmiarniarneq, qilalukkanut qaqortanut qernertanullu qassusersorneq, qilalukkanut qernertanik piniarneq, arfernik pilanneq aamma assartuutinut pillugit ileqqoreqqusaliat.



NAJUKKANNI PINIARNERMUT AALAJANGERSAKKAT PILLUGIT APEQQUTIT

Najukkanni piniarnermut aalajangersakkat nalornissutigigukkit kommunimi inuussutissarsiornermut siunnersorti aperisinnaavat imaluunniit Aalisarnermut Piniarnermullu Naalackersuisoqarfimmi Piniarnermut Aallaaniarnermullu Immikkoortortaqaqfik piniakkat killilersukkat killilersugaanngitsullu pillugit aqutsinermik akisussaasuusoq.

Kommunip najugarisanni piniarnermut tunngasorpassuarnik akisuteqaqfigisinnaavaatit, soorlu najukkanni piffissat piniarfiusut atuuttut pillugit, uumasunut killilersukkanut akuersissummik qanoq pissarsisoqartarnera, uumasunik killilersukkanik immikkut nalunaarsuiffiit immersorneqarnissaat allarpassuillu pillugit.

Aammattaaq nittartagaq sullissivik.gl aqutigalugu piniakkanut tunngasut nalinginnaasunik paasissutissat pissarsiarineqarsinnaapput.

PINIARNERMUT ALLAGARTALERINERMI IMMINUT SULLINNEQ

Ukiumoortumik pisanik nalunaarsuiffik illit nammineq www.sullissivik.gl aqutigalugu imaluunniit najukkanni Sullissivimmi nalunaarutigisassavatit. APN-imut nassiuatissanngilat. Piniarnermut allagartalersuinermit tunngasut taakku marluk aqutigalugit iserfigisinnaavatit, tassanilu aamma piniarnermut allagartat ukiup ingerlanerani tammaasimagukku anillatseqqissinnaavat imaluunniit pdf-tut toqqorsinnaallugu. Netbank aqutigalugu akiliisimanermit uppernarsaatip anillatseqqinnissaa eqqaamassavat.

Piniarnermut allagartamik immikkut akuerineqarnissaq pillugu qinnuteqaatit Aalisarnermut Piniarnermullu Naalackersuisoqarfiup sulii suliarisarpai.

Piniarnermut allagartat pappiaaraq A4-tut angissuseqarpoq. Allakkerivimmi akiliisimaguit eqqaamallugu illit atinnik allaqqasortaliup nassarnissaa. Tassa taanna akiliisimanermit uppernarsaat ilanngullugu piniarnermut allagartaasoq.